

# **ЎЗБЕКИСТОНДА ХОРИЖИЙ ТИЛЛАР**

**Илмий-методик электрон журнал**

# **FOREIGN LANGUAGES IN UZBEKISTAN**

**Scientific-methodological electronic journal**

# **ИНОСТРАННЫЕ ЯЗЫКИ В УЗБЕКИСТАНЕ**

**Научно-методический электронный журнал**

**ISSN  
2181-8215 (Online)**

**№ 3 (32)/2020**

## АДАБИЁТ ВА МАДАНИЯТ

<b>Илёс Абдукаюмович ИСМОИЛОВ.</b> “Сади Искандарий” достонидаги адабий таъсир ва ўзига хослик масаласи хусусида.....	<b>229–235</b>
<b>Акрамжон Қодирович ДЕХҶОНОВ.</b> “Хайрат ул-аброр” достонида Бадиуззамон Мирзо васфи.....	<b>236–245</b>
<b>Султонбек Эрмаматович НОРМАМАТОВ.</b> Жадид адибларининг ўзбек луғатчилиги анъаналари ривожидаги ўрни.....	<b>246–256</b>
<b>Тозагул Ражаповна МАТЕҚУБОВА.</b> Шарқона поэтик ифода имкониятлари.....	<b>257–275</b>
<b>Виктория Сергеевна ДВОРЯШИНА.</b> “Steinbeck still has a place” (Жон Стейнбекнинг 60-йиллардаги адабий меросини ўрганишнинг долзарблиги масаласи).....	<b>276–287</b>
<b>Каромат Ташхўжаевна МУЛЛАХЎЖАЕВА.</b> Алишер Навоий ғазалларида тасаввуфий маънонинг бадиий талқини хусусида (орифона ғазаллар мисолида).....	<b>288–297</b>
<b>Озода Тоҳировна ТОЖИБОЕВА.</b> Структурал методнинг таҳлил имкониятлари .....	<b>298–305</b>
<b>Малика Надир гизи АДИГЁЗАЛОВА.</b> Озарбайжон маърифатчисининг таълим ва тарбия муаммоларига қарашлари.....	<b>306–317</b>

## "ХАЙРАТ УЛ-АБРОР" ДОСТОНИДА БАДИУЗЗАМОН МИРЗО ВАСФИ

Акрамжон Қодирович ДЕХҚОНОВ

Филология фанлари номзоди, ўқитувчи

Тошкент давлат ўзбек тили ва адабиёти университети,

Тошкент, Ўзбекистон

## О ЦАРЕВИЧЕ БАДИУЗЗАМОН-МИРЗО В ПОЭМЕ "СМЯТЕНИЕ ПРАВЕДНЫХ"

Акрамжон Қодирович ДЕХҚОНОВ

Кандидат филологических наук, преподаватель

Ташкентский государственный университет узбекского языка и литературы

Ташкент, Узбекистан

## ON PRINCE BADIUZZAMON IN THE POEM "ASTONISHMENT OF NICE PEOPLE"

Akramjon Kodirovich DEHKHONOV

Doctor of philosophy (Ph. D.) philology, teacher

Tashkent State University of the Uzbek Language and Literature

Tashkent, Uzbekistan [dehqonova67@gmail.com](mailto:dehqonova67@gmail.com)

UDC (УЎК, УДК): 82-1/-9

For citation (иқтибос келтириш учун,  
для цитирования,):

Дехқонов А. Қ. "Хайрат ул-аброр"  
достонида Бадиuzzамон мирзо васфи  
//Ўзбекистонда хорижий тиллар. — 2020.  
— № 3 (32).— Б.236- 245.

<https://doi.org/10.36078/1596781658>

Received: May 28, 2020

Accepted: July 18, 2020

Published: July 20, 2020

Copyright © 2020 by author(s) and  
Scientific Research Publishing Inc.  
This work is licensed under the Creative  
Commons Attribution International License  
(CC BY 4.0).  
<http://creativecommons.org/licenses/by/4.0/>



Open Access

**Аннотация.** Ушбу мақолада Алишер Навоий "Хайрат ул-аброр" достонининг йигирманчи мақолатидан ўрин олган темурий шаҳзода Бадиuzzамон мирзога қилган ўғитнасиҳатлари хусусида сўз юритилади. Шунингдек, "Хамса" достонларидағи Музaffer мурзо, Шоҳфариб мурзо, Султон Увайс Баҳодир каби ёш темурий шаҳзодаларга бағишиланган бобларнинг умумий мазмун-мундарижасига ҳам тўхталиб ўтилади. Бадиuzzамон мирзонинг отаси Хуросон хукмдори Султон Ҳусайн Бойқаро билан муносабати, бу муносабатларнинг Алишер Навоий ижодий меросида акс этиши, буюк шоирнинг ота ва фарзанд ўргасидаги кескинликни юмшатиш борасида саъй-харакатлари ҳамда ушбу ходисаларнинг шоир ижодида қай даражада ўз ифодасини топғанлиги таҳлил килинган. "Хайрат ул-аброр" достонининг Бадиuzzамонга бағишиланган бобидаги Навоийнинг насиҳатлари шаҳзода учун программ характердаги ғоят аҳамиятли фикрлар эканлиги таъкидланган. Алишер Навоийнинг Султон Ҳусайн Бойқаро давлатининг равнаки йўлидаги саъй-харакатлари, жонкуярлиги достонлари ва насрый асарларида қай тарзда ўз ифодасини топғанлиги хусусидаги мулоҳазалар ҳам билдирилган. Навоийнинг Бадиuzzамонга насиҳатида хавотир билан айтган гаплари чорак асрдан кейин рўй берганлиги таъкидланган.

**Калит сўзлар:** Алишер Навоий; темурий шаҳзодалар; Бадиuzzамон; "Хайрат ул-аброр"; "Хамса" достонлари; мақолатлар.

**Аннотация.** В статье речь идёт о наставлениях и назиданиях царевичу-темуриду Бадиuzzамону-мирзо, приведенных Алишером Навои в двадцатой главе поэмы «Смятение праведных». Кроме того, в статье приведен обзор содержания

глав в поэмах «Пятерицы», посвященных непосредственно молодым царевичам-темуридам — Музффару-мирзо, Шохгарибу-мирзо, Султону Увайс Баходиру. Автор анализирует отношения правителя Хорасана Султона Хусейна Байкары и его сына Бадиuzzамона-мирзо, что отражено в творческом наследии Алишера Навои, даёт оценку его действий, направленных на смягчение напряженности в отношениях отца и сына, рассматривает, в какой степени всё это отражается в творчестве великого поэта. Исследователь особо констатирует, что назидания Алишера Навои Бадиuzzамону, приведенные в поэме «Смятение праведных» имели программный характер для царевича и содержали очень ценные рассуждения. Также приведены размышления автора по поводу целенаправленных действий Султона Хусейна Байкары для развития страны и анализирует, в какой степени это отражено в поэмах и его прозаическом творчестве. Также в статье особо отмечается, что беспокойство и дурные предчувствия Навои в назиданиях Бадиuzzамону всё же реализовались спустя четверть века.

**Ключевые слова:** Алишер Навои; царевичи-темуриды; Бадиuzzамон; «Смятение праведных»; поэмы «Пятерицы»; макалат-главы.

**Abstract.** This article is about the advice to the Temurid prince Badiuzzamon mirzo, given by Alisher Navoi in Chapter Twenty of the poem “Astonishment of Nice People”. In addition, the article provides a brief overview of the poems “Quintuple”, dedicated to the young Temurid princes, such as Muzaffar mirzo, Shohgarib mirzo, Sulton Uvais Bahodir. The author analyzes the relations between the ruler of Khorasan, Sulton Husain and Baikara, and his son, Badiuzzamon mirzo, which is reflected in the creative legacy of Alisher Navoi, assesses his actions aimed at easing the tension in the relations between father and son, and considers to what extent all this is reflected in the work of the great poet. Advice of Alisher Navoi in the poem “Astonishment of Nice People” The chapter, which was dedicated to the Badiuzzamon had a programmatic nature for the Prince and contained very valuable arguments. The author's reflections on the purposeful actions of Sulton Husain Baikara for the development of the country are also given, and analyzes to what extent this is reflected in the poems and his prose work. Also, the article specifically notes that Navoi's anxiety and bad forebodings in the advices to the Badiuzzamon were still realized after a quarter of a century.

**Keywords:** Alisher Navoi; temurid-princes; Badiuzzaman; “Astonishment of Nice People”; “Quintuple” poems; makalat.

**Кириш.** Алишер Навоийнинг темурий шаҳзодалар, хусусан, Xуросон ҳукмдори Султон Ҳусайн Бойқаронинг ўғиллари билан муносабатлари мамлакатимиз олимлари томонидан ўрганилган. Бу масалани бутунги кун нуқтаи назаридан кўриб чиқилса, ушбу муносабатларнинг янги-янги қирралари очилиб бориши маълум бўлмоқда. Бундан 30–40 йиллар илгари ушбу мавзуга боғлик фикрларни айтиш қийин бўлган ўринларда бугун бемалол мuloҳаза юритиш мумкин. Булар — Навоийнинг шаҳзодалар ҳақидаги турли асарларида айтган мuloҳазалари. Улардаги нозик ишоралардан буюк шоирнинг асл муддаосини илғаб олиш мумкин.

**Асосий қисм.** Алишер Навоий ўзининг “Хамса”си таркибидаги достонларида бир неча шаҳзодаларни — Ҳусайн Бойқаронинг ўғилларини зикр қиласди, уларга алоҳида боблар бағишлиб, мадҳ этади, насиҳатлар қиласди. Жумладан, Бадиуззамон мирзо мадҳи “Ҳайрат ул-аббор” (1, 317), “Фарҳод ва Ширин” (2, 55) “Лайли ва Мажнун” (4, 44) ва Садди Искандарий” (5, 71) достонларида келади. Музаффар мирзога “Садди Искандарий” (5, 543) достонининг 84–85-боблари бағишиланган. Шоҳғариф мирзога “Фарҳод ва Ширин” (2, 460) достонининг 53-бобида насиҳатлар қилинган. Шунингдек, Султон Ҳусайн Бойқаронинг жияни ва куёви Султон Увайс Баҳодир мадҳи ва унга насиҳатлар “Лайли ва Мажнун” (3, 299) достонининг 37-бобидан ўрин олган. Бу бағишивларда Навоий даставвал шаҳзодаларнинг яхши сифатларини, фазилатларини зикр қилиб ўтади, сўнг уларга энг зарур насиҳатларни беради. “Хамса”даги Ҳусайн Бойқарога бағишиланган боблар билан шаҳзодалар мадҳ этилган боблардаги асосий фарқ шуки, Ҳусайн Бойқаро ҳақида Навоий жуда хушёрлик билан, ҳукмдор билан унинг тобеси ўртасида лозим бўлган масофани сақлаган ҳолда, мамлакатнинг олий ҳукмдори ҳақида сўзлаётганини чуқур англаб сўз юритади. Шаҳзодаларга бағишиланган бобларда ҳам шоир эҳтиётлик билан сўзлайди. Лекин барибир ёшдаги фарқлар ва ўзининг султонга яқинлиги, мамлакат ва ҳалқ тақдирига ич-ичидан жавобгарлик ҳисси, темурийлар сулоласига бўлган буюк садоқати сабаб Навоий шаҳзодаларга оталарча насиҳатларини самимий ва очиқ тарзда баён қиласди.

“Хамса”даги шаҳзодаларга бағишиланган боблар ичида Бадиуззамон мирзо ҳақидаги ўринлар алоҳида аҳамиятга эга. Юқорида айтиб ўтганимиздек, “Хамса”нинг “Сабъай сайёр”дан бошқа барча достонларида бу шаҳзода мадҳ этилган боблар мавжуд. “Фарҳод ва Ширин” достони эса Бадиуззамонга бағишиланган.

Алишер Навоийнинг Бадиуззамон мирзога бунчалик кўп эътибор қаратиши, у ҳақда бунча кўп қайғуриши хусусида адабиётшунослигимизда муайян фикрлар айтилган. Айниқса, Навоийнинг бу шаҳзодага ёзган мактуби (“Муншаот”даги 57-мактуб) ҳақида кўп тадқиқотчилар ўз мулоҳазаларини билдирганлар (9, 46). Навоийнинг “Муншаот”идаги Бадиуззамонга ёзилган 56-мактуб мазмунидан маълум бўладики, шоир бу шаҳзодага насиҳат қилиш борасида анча журъатли бўлган (6, 183). Шаҳзодага ёзилган ушбу мактублардаги кескин оҳанг бу хатларнинг ота-бона, яъни Ҳусайн Бойқаро ва Бадиуззамон муносабатлари анча ёмонлашган пайтда, 1495 йилдан кейин ёзилганига далолат қиласди. 56-мактуб Навоийнинг Бадиуззамон мирзога муносабатини аниқлашда ҳал килувчи аҳамиятга эгадир. Шу жиҳатдан ушбу мактуб “Хамса”даги унга бағишиланган боблар учун калит вазифасини ўтайди. Шунинг учун достонлардаги бу шаҳзодага бағишиланган боблар ҳақида сўзлашдан олдин мактуб мазмуни билан танишиш зарур бўлади.

Навоий ўз мактубини Пайғамбар алайхиссаломнинг бирмунча кескин оҳангдаги “Тангрининг ризоси отанинг ризосида, Тангрининг ғазаби отанинг ғазабидадир” мазмунидаги ҳадисини келтириш билан бошлайди. Ваҳоланки, Алишер Навоийнинг

мурофаға шаклида (ўзидан юқори даражадаги шахсга) ёзилган мактубларининг шакли одатда дуо-муддао-дуо ёки мадх-муддао-дуо шаклида бўлар эди (9, 31). Шуниси қизиқки, бу, яъни 56-мактуб ҳам Навоий томонидан ўзидан юқори даражадаги шахсга, шаҳзодага ёзиляпти. Лекин унинг бошланшиши мадҳ билан ҳам, дуо билан ҳам бошланмаяпти, тугашида ҳам мадҳ билан ҳам, дуо билан ҳам тугамаяпти. Бирдан муддаога ўтиляпти. Отанинг фарзандга нисбатан қай даражада улуғ зот эканлиги ҳакида қисқача сўз юритилиб, ота мадҳи ҳакида Адиг Аҳмаднинг бир рубойиси келтирилади:

*Атодин хато келса кўрма хато,  
Савоб бил хато токи қилса ато.  
Атонинг хатосини билгил савоб,  
Сени юз балодин қутқаргай Худо.*

Сўнг отага нисбатан қилинган беадабликларнинг оқибати ҳакида тарихдан бир-икки мисол келтирилади. Муқаддима мазмунидан сезиладики, мактубда сўз Бадиuzzамон мирзо томонидан отаси Султон Ҳусайн Бойқарога нисбатан қилинган риоясиз ҳатти-харакатлар хусусида боради.

Шундан сўнг Алишер Навоий бирдан мақсадга кўчади: “Бу учурда бир неча иш сизнинг тарафингиздин эшитилдиким, вожиб кўринди сизга арз қилмоқким, борча Мирзонинг жонибининг риоятидин ғофил бўлғон чоғлиғ кўрунди...” (6, 184). (Бу муддатда Сиз тарафдан содир этилган бир неча ишда Мирzonинг (Ҳусайн Бойқаронинг) риояти қилинмагандек бўлди. Мана шу нарсаларни билдириб кўйиш менга вожиб кўринди).

Шундан кейин шаҳзода томонидан отасининг риояси қилинмаган тўртта ишни Навоий санаб келтиради. Гарчи шоир шаҳзодага жуда юксак одоб ва назокат билан ўз фикрини баён қилса ҳам, лекин сўзлар зимнидаги кескинлик ва оғриниши оҳангини сезиб олиш қийин эмас. Шу билан бирга, бу мактубда буюк адабнинг бу улуғ сулолага, хусусан, Ҳусайн Бойқарога чексиз садоқати, самимий дўстлиги, унинг фарзандларига, айникса, Бадиuzzамон мирзога оталарча меҳрибонлиги ва жонфидолиги сезилиб туради. Алишер Навоий ҳассос ва зийрак қалби билан келажақда бу салтанатда юз беражак улкан фожиаларни, парокандаликни ҳис қилиб турарди. Бекорга у мактуб охирида: “Эмди бу кулнинг жони куйганда ўзгаларнинг этаги куймас...” деб нола қилмайди. Дарҳақиқат, бу давлат, бу сулола, бу дўст учун Навоийнинг жигар-бағри куйди, жони ўртанди. Бу йўлда елди, югурди, жонини, умрини, молини сарфлади. Навоийнинг саодати шундаки, у бу сулоланинг охирги фожиали кунларини, салтанатнинг инқирозини, шаҳзодаларнинг баъзилари қўйдек бўғизланишларини, баъзилари хотин, бола-чақаларини, оналарини душман қўлига ташлаб, ўз жонини кутқариш учун қочиб кетганини кўрмади. Буларни шоирнинг ўта нозик ва таъсирчан қалби кўтара олмас эди. Буюк шоирнинг саодати шундаки, у буюк дўстининг қўлида жон берди. Иzzат-икром ва шараф билан дафн этилди. Навоий ўз амали билан, ўз сўзи билан давлатга, халқقا, салтанатга,

дўстга садоқатнинг рамзи бўлиб қолди. У бу борадаги сўзларини ўз амали билан исботлади.

Энди “Ҳайрат ул-аброр”даги Бадиuzzамон мирзога бағишланган бобларга қайтамиз. Маълумки, Навоийнинг ушбу достони йигирмата мақолатдан иборат бўлиб, ҳар бир мақолатда муайян бир мавзу ҳақида сўз боради. Ҳар бир мақолат тугагач, унинг мавзусига оид бир хикоят келтирилади. Достоннинг йигирманчи мақолати шаҳзода Бадиuzzамон Мирзога бағишланган. Аввало, бу бобнинг бошқа достонлардаги ушбу шаҳзода мадҳ этилган боблардан ҳажман анча катта эканлигини таъкидлаш лозим. “Ҳайрат ул-аброр”да Бадиuzzамонга бағишланган йигирманчи боб 232 байтни ташкил этгани холда, “Фарҳод ва Ширин”даги унга аталган боб 53 байтни, “Лайли ва Мажнун” ва “Садди Искандарий”даги унга аталган боблар эса ҳар бири қирқ байтдан иборат.

“Хамса”нинг бошқа достонларига нисбатан “Ҳайрат ул-аброр” достони программ характерга эга бўлганидек, бошқа достонлардаги Бадиuzzамонга бағишланган бобларга нисбатан ҳам “Ҳайрат...” даги унга бағишланган бобни программ характерга эга, деб айтиш мумкин. “Фарҳод ва Ширин”, “Лайли ва Мажнун” ҳамда “Садди Искандарий”даги Бадиuzzамон мирзога бағишланган боблар ҳажман анча кичик бўлиб, улар фақат шаҳзоданинг мадҳидан иборат. “Ҳайратул-аброр”да шоир бутунлай бошқача йўл тутади. Тўғри, бу достондаги шаҳзодага бағишланган боб ҳам унинг мадҳи билан бошланади, одоби тасниф шуни тақозо қиласа эди. Лекин бу ўриндаги мадҳ ушбу бобда айтилажак фикрлар учун фақат кириш-муқаддима вазифасини ўтайди. Бу ерда Бадиuzzамон мадҳ этилган мисралар бор-йўғи 11 байтни ташкил этади, холос. Шундан сўнг Навоий жуда усталик билан гап оқимини насиҳат томонга буради. Ёш шаҳзодага бу ўринда айтилган ўйтларни унинг учун тузиб берилган ҳаракат дастури, деб аташ мумкин. Навоий шаҳзодага келажақдаги фаолияти давомида дуч келиши мумкин бўлган барча вазиятларни назарда тутиб насиҳат қиласи. Ҳатто бу айтилганларга риоя қиласа, бошига тушиши мумкин бўлган эҳтимолий ҳолатларни ҳам умумий тарзда кўрсатиб кетадики, буни улуф шоирнинг башорати, деб аташ мумкин.

Боб аввалида Навоий Бадиuzzамон мирзони олий наасаб, юксак фазилатлар соҳиби сифатида мадҳ этади.

Шаҳзоданинг мадҳини якунлаб, унга насиҳат қилишга ўтар экан, шоир ўзи билан Ҳусайн Бойқаро ўртасида бўлиб ўтган бир гапни эслайди. Яъни, подшоҳ менга кўнглингтга нима яхши гап келса, албатта менга айтгин, агар эътибор бермасам, яна қайта-қайта айтавергин, деб тайинлаган, — дейди шоир. Модомики, подшоҳнинг ўзи менинг сўзимга шунчалик эътибор берган экан, энди сенга ҳам панд-насиҳат қиласа, ери — ўрни бор, дея унга насиҳат қилишга ҳақдор эканлигини таъкидлаб, насиҳатни бошлайди.

Шуни таъкидлаш мухимки, “Ҳайрат ул-аброр” ёзилган 1483 йили ҳали ота-бала (Ҳусайн Бойқаро ва Бадиuzzамон мирзо) муносабатлари бузилмаган пайтлар эди. Муносабатлар тахминан 1495 йиллардан кейин бузилган. Бадиuzzамон мирзо ҳали ёш (у 1458 йилда туғилган) эди, укалари, хусусан отаси билан унинг

ораси бузилишига сабаб бўлган Музaffer мирзо ҳам ёш бола бўлган (у тахминан 1472–73 йиллари туғилган).

Алишер Навоийнинг Бадиuzzamon мирзога катта эътибор беришининг сабаби шуки, у подшоҳнинг катта ўғли эди, қолган укалари ундан анча кичкина эдилар. Шу боис Навоий уни отасига энг яқин ва садоқатли ўғил, бинобарин, муносиб валиаҳд бўлади, деб жуда катта умидлар боғлаган эди.

Навоий шаҳзодага насиҳатини умрнинг, дунёниг ўткинчилигини эслатиш билан бошлайди:

*Бил муниким, умр вафосиз дурур,  
Давлат ила жсоҳ бақосиз дурур.*

Шундан сўнг шоир Бадиuzzamon мирzonинг жуда улуғ неъмат устида турганлигини, бунинг шукронасини қайта-қайта, тинимсиз килиши лозимлигини таъкидлайди. Ҳар қандай ҳолатда Яратувчини эсдан чиқармасликка, барча неъматларни фақатгина Ундан деб билиши лозимлигини уқтиради. Сенга Тангри лутф қилиб тож-тактни бериб, хукмингга ҳаммани мутеъ қилиб қўиди. Барча мулк-салтанат У Зотнинг қўлида. Сенга Унинг шунчалик карам-саҳоватининг шукрини қилмасанг, хоҳлаган пайтда мулкни сендан олиб қўяди, деб ёзди шоир:

*Мунча карам шукрини гар билмасанг,  
Ҳар неки амр этти адo қилмасанг...  
Етса газаб тунд ели нетгасен,  
Мулк Анинг мулки, қаён кетгасен? (1, 322)*

Бу мисраларни орадан чорак аср ўтиб — 1507 йил Ҳусайн Бойқаро вафотидан кейин юз берадиган бошбошдоқлик, парокандаликни олдиндан башорат қилаётгандек ёзди шоир.

Шоир ўз насиҳатини давом эттириб, шаҳзодага Яратувчини доим ёдда тутишни, шариатни қаттиқ ушлашни, мулкни бошқаришда адолат билан иш тутишни тайинлади. Навоий ўз асарларида хукмдорлик, шоҳлик ҳақида сўз юритган ўринларда адолат масаласига алоҳида тўхтаб ўтганидек, ушбу бобда ҳам адолат ҳақида батафсил сўзлайди. Адолат мулкнинг мадори, яъни салтанатни тутиб турувчи асосий устундир, — деб таъкидлайди у. Шунингдек, коғир хукмдор адолат қилса, унинг мулки барқарор туради, мўмин хукмдор зулм қилса, унинг мулки таназзулга учрайди, мазмунидаги машҳур ҳикматли сўзнинг маъносини келтириб ўтиш билан адолат ҳақидаги фикрини бошлайди. Шундан сўнг адолатли хукмдорнинг даражаси дунёда ҳам, охиратда ҳам баланд бўлишини айтади. Кейин “адл” сўзининг ҳар бир ҳарфига ўзига хос гўзал таърифлар беради. Сўнgra адлнинг зидди бўлган зулмнинг қанчалик оғир юқ — гуноҳ эканлиги, мазлумнинг охи қанчалик улуғ салтанатларни ҳам вайрон қилиб юборганлигини таъкидлайди. Навбатдаги сўз мавзуси нафснинг кўйига кириб, айшишрат домига тушшиб қолмаслик ҳақида боради. Нафснинг сўзига кирсанг, охир-оқибатда у сени хароб қиласи, — дея ёш шаҳзодага насиҳат қиласи шоир.

Шу ўринда Ҳусайн Бойқаро ва унинг ўғилларининг ахлоқи ва феъл-атвори хусусида Захириддин Мухаммад Бобурнинг

фикрларига мурожаат қилмасдан ўтиб бўлмайди. Маълумки, Бобур мирзо “Бобурнома”да Ҳусайн Бойқаро ва унинг ўғиллари ҳақида жуда кенг, батафсил маълумот беради. Уларнинг ижобий ва салбий хислатларини шафқатсиз ростлик билан тасвирлайди. Бобур мирзо Ҳурросон ҳукмдори Ҳусайн Бойқаронинг шиҷоати, сиёсати, зийраклиги ва тутумидаги жуда кўп ижобий жиҳатларни таъкидлайди. Шу билан бирга ундаги ва ўғилларининг ахлоқидаги салбий томонларини ҳам очиқ ёзди: “Фисқ ва фужур ўзида (Ҳусайн Бойқарода. — А.Д.), ўғлонларида ва эл-улусида асрү шоे эди. Ушбуларнинг шоматидин эдиким, мундоқ хонводадин етти-секкиз йилда бир Муҳаммад Замон мирзодин ўзга осор ва аломат колмади” (8, 153). “Бобурнома”да бундан бошқа ўринларда ҳам Ҳусайн Бойқаро ўғилларининг салбий хислатлари айтиб ўтилади.

Бобур мирзонинг Ҳусайн Бойқаро ва унинг ўғиллари, шунингдек, ўз амакилари ва амакиваччалари, бошқа темурий шаҳзодалар ва бошқа ҳукмдорлар ҳақида дадил ва истиҳоласиз сўзлашининг сабаби у, яъни Бобур Мирзо мавқеда ва насл-насада сўз юритилган кишилар билан тенг ёки улардан баланд даражада бўлган. Шунинг учун уларнинг камчиликлари ва айблари ҳақида дадил сўзлаган. Ўша давр этикетига кўра, жамиятнинг қуий табақасига мансуб шахслар юқори даражадаги шахслар, хусусан, ҳукмдорлар ҳақида, ҳатто улар вафот этиб кетган бўлса ҳам, очиқ-ойдин ҳамма гапни гапириши жоиз бўлмаган.

Шу ўринда бир савол туғилади. Алишер Навоий Ҳусайн Бойқаро ва унинг ўғиллари, тобеълари ҳақидаги Бобур мирзо айтган ҳолатлардан хабардор эдими ёки йўқми?

Албатта, Алишер Навоий каби зийрак ва фаросатли зот бу нарсалардан хабардор бўлмаслиги мумкин эмас. Лекин бу гапларни очиқ айтишга ёки ёзиш учун Навоий монеъ бўлувчи бир неча омиллар бўлган. Улар:

1. Навоий ҳар қанча юқори даражадаги шахс бўлмасин, унинг ўзи ҳам, ота-боболари ҳам бу сулоланинг, бу хонадоннинг хизматчиси бўлиб, хизматчилар ўз ҳукмдорлари ҳақида салбий гап айтишга ҳакки йўқ эди (“Агарчи бу хоксорнинг (яъни Навоийнинг. — А.Д.) ота-бобоси ул ҳазратнинг обо аждоди хизматларидақим... улуғ маротибқа сазовор ва бийик маносибқа комгор бўлғон эрдилар”) (6, 246).

2. Алишер Навоий учун Ҳусайн Бойқаро нафақат яқин дўст ва сирдош, балки валинеъмат (унга етган неъматларга сабабчи) ҳам эди. Дарҳақиқат, Алишер Навоий то Ҳусайн Бойқаро таҳтга ўтиргунча ҳеч нарсаси йўқ бир толиби илм бўлган. Навоий ўзи ёзганидек:

*Сабаб қилмаса шоҳ лутфин Ҳудо,  
Мену сен ким эрдук — бир-ики гадо (5, 560).*

(“Садди Искандарий” достонида укаси Дарвеш Алига бағишлиланган бобдан) (яъни Ҳудойи таоло Султон Ҳусайн Бойқаронинг лутфини сабаб қилмаганда, мен билан сен бир-икки гадо эдик. Яъни ҳеч нарсамиз йўқ эди). Ўз валинеъмати ҳақида танқидий гапларни гапириш туз еган жойига нонкўрлик қилиш бўлар эди. Бундай иш Навоий тарафидан содир этилишини тасаввур ҳам қилиб бўлмайди.

Кўриб-кўрмасликка олиш, эшитиб-эшиитмасликка олиш ҳам раёсат — бошқарувнинг усулларидан бири. Навоий “Вақфия”да ёзади: “...аммо анинг кишвари гулистонининг ҳарими атрофида ва мулки бўстонининг акнофида кўрмас нимадин кўзумни нарғис қўзидек кўр ва эшиитмас нимадин қулогимни бинафша қулогидек кар ва тутмас нимадин илгимни чинор илгидек шал ва бормас ердин аёғимни сарв оёғидек ланг ва айтмас сўздин, батахсис маҳфий асрореким, гул хурдаси масаллик гунчадек кўнглумда амонат топшурди — ифшосидин тилимни савсан тилидек гунг қилди (4, 253).

(Аммо унинг (яъни Ҳусайн Бойқаронинг. — А.Д.) мамлакати гулистонининг хос худудида ва салтанати бўстонининг атрофида кўрмаслигим лозим бўлган нарсадан қўзимни нарғис гулининг қўзидек кўр ва эшиитмаслигим лозим бўлган нарсадан қулогимни бинафша қулогидек кар ва ушламаслигим лозим бўлган нарсадан қўлимни чинор қўлидек шол ва бормаслигим лозим бўлган ердан аёғимни сарв дараҳтининг оёғидек ланг — юрмас ва айтмаслигим лозим бўлган сўздан, хусусан, гунча каби кўнглумга (Ҳусайн Бойқаро. — А.Д.) омонат топширган маҳфий сирларни ошкор қилишдан, тилимни савсан тилидек гунг — соқов қилдим).

Бу айтганларидан жуда кўп ҳолатларда Навоий ўзини салтанатда бўлаётган ишлардан кўриб-кўрмасликка, эшитиб-эшиитмасликка олишга мажбур бўлганлигига ишораларни сезиш мумкин.

Навоий шаҳзодага насиҳатни давом эттириб, подшоҳнинг халққа лутф-карами яхши нарса, лекин ўз ўрнида қаҳр-сиёsat ҳам зарур, дея таъкидлайди. Ёмонларга қилинган лутф-карам яхшиларга зулм қилиш билан баробардир. Малҳам билан тузалмаган ярани ништар — тиф билан тузатилади, деб жамиятдаги ёмонларни йирингли ярага, сultonни эса тиф тутган табибга қиёс қилиб, гўзал ташбеҳлар воситасида ёш шаҳзодага насиҳатни давом эттиради. — Ҳеч кимни аввал синамасдан ўзингга сирдош қилма, оз айби бор кишига қаттиқ сиёsat қилма, бирорни катл қилишга шошма, айникса, ёлғон гувоҳлик берувчиларнинг сўзига ишониб, бирорни жазолашдан эҳтиёт бўл. Кўнглингга бир фикр келса, маслаҳат-машваратсиз уни амалга оширишга шошма. Ўзингнинг раъй-фикрингга суюниб қолма, маслаҳаттага яроқли кишилардан маслаҳат олишни одат қил, лекин жуда узун кенгаш қилиб, бир масала устида гап кўпайишига ҳам йўл қўйма. Агар душман билан жанг қилишга тўғри келса, жангни уруш қоидаларига мувофиқ олиб боргин, урушда камчиликка йўқ қўйма, ўлимдан қўркиб юраксизлик қилма. Ҳеч ким ажали етмагунча ўлмайди. Шуни яхши билгинки, душман билан тўқнашган пайтингда халқингнинг дуоси сенга паноҳ бўлади. Душманинг устидан ғолиб чиксанг, ғолиблигинг шукронасига уни қатл қилишга шошма.

Бу менинг насиҳатларимга шоҳнинг (Ҳусайн Бойқаронинг — А.Д.) олиб борган ишлари дастур — қўлланма бўлди. Агар барча ишингда отангга ўхшасанг, ҳеч қачон пушаймон бўлмайсан. Агар давлатни ва узоқ яшашни истасанг, бу пир — отангнинг олдида тақсирга, яъни камчиликка йўл қўйма, — дея ўз насиҳатини яқунлайди Алишер Навоий.

**Хулоса.** Йигирманчи мақолатнинг ниҳоясида Навоий отасига итоат қилишни шаҳзодага қайта-қайта тайинлайди. Шундан сўнг “Ҳайрат ул-аброр”нинг бошқа мақолатларидан кейин бўлганидек, бу мақолатдан кейин ҳам бир ибратли воқеани келтириш билан ўз фикрини якунлайди. Нақшбандия тарикатининг улуғларидан бири Хожа Мухаммад Порсо ўғли Хожа Абу Наср Порсо билан ҳаж килгани борадилар. Ота-бала ҳаж арконларини якунлагач, йиғилган халойик Хожа Мухаммад Порсадан бутун ҳаж аҳли учун дуо қилишини сўрашади. Шунда Хожа Мухаммад Порсо ўғлини кўрсатиб:

*Айттиким, ул манга фойик дурур,  
Бўйла баланд иш анга лойиқ дурур (1, 329).*

(Хожа айтди: “Ўғлимнинг даражаси мендан баландроқ, шунинг учун бундай баланд иш, яъни ҳаж аҳли учун дуо қилишга у лойикроқдир”) деб жавоб беради ва дуо қилиш ҳаққини ўғлига топшириб, “Сен дуо қил, мен минбардан пастда “Омин” деб турман, — дейди.

Хожа Абу Наср Порсо отасининг амрига мувофиқ минбарга кўтарилиб, дуо қиласи ва “Эй Парвардигор, агар мен дуо қилишни билмаган бўлсан, минбардан пастда “Омин” деб турган инсоннинг “омин”ини зое қилмагин!” — дея ўз илтижосини якунлайди.

Навоий қиссадан ҳисса қилиб ўғил ҳар қанча мартааси юксалгани билан ота барибир ўзининг оталик ҳаққи жиҳатидан ундан юқори туришини таъкидлаб қўймоқда.

Улуғ адабнинг бу насиҳати гарчи Бадиuzzамон мирзо учун айтилган бўлса-да, лекин бошқа шаҳзодаларга ҳам умумий ҳолда тааллукли эди. Шоирнинг насиҳатлари бугунги кунда ҳам ўз аҳамиятини йўқотган эмас.

#### **Фойдаланилган адабиётлар**

1. Алишер Навоий. Ҳайрат ул-аброр. МАТ. 20 томлик. 7-том. — Тошкент, 1991. — 392 б.
2. Алишер Навоий. Фарҳод ва Ширин. МАТ. 20 томлик. 8-том. — Тошкент, 1991. — 544 б.
3. Алишер Навоий. Лайли ва Мажнун. МАТ. 20 томлик. 9-том. — Тошкент, 1992. — 356 б.
4. Алишер Навоий. Сабъаи сайёр. МАТ. 20 томлик. 10-том. — Тошкент, 1992. — 448 б.
5. Алишер Навоий. Садди Искандарий. МАТ. 20 томлик. 11-том. — Тошкент, 1993. — 640 б.
6. Алишер Навоий. Махбуб ул-қулуб, Муншаот, Вақфия. МАТ. 20 томлик. 14-том. — Тошкент, 1998. — 304 б.
7. Аҳмедов Т. “Ҳамса” қаҳрамонларининг характер жозибаси. — Тошкент, 1986. — 68 б.
8. Бобур Захириддин Мухаммад. Бобурнома. — Тошкент, 1989. — 368 б.
9. Эргашев Қ. Ўзбек насирида иншо. — Тошкент, 2011. — 108 б.
10. Юсупова Д. Ўзбек мумтоз адабиёти тарихи. — Тошкент, 2013. — 272 б.

11. Ҳайитметов А. Навоийхонлик сұхбатлари. — Тошкент, 1993.  
— 216 6.

#### References

1. Alisher Navoii, *Hairat ul-abror*, vol. 7, Tashkent, 1991, 392 p.
2. Alisher Navoii, *Farkhod va Shirin*, vol. 8, Tashkent, 1991, 544 p.
3. Alisher Navoii, *Laili va Mazhnun*, vol. 9, Tashkent, 1992, 356 p.
4. Alisher Navoii, *Sab"ai saier*, vol. 10, Tashkent, 1992, 448 p.
5. Alisher Navoii, *Saddi Iskandarii*, vol. 11, Tashkent, 1993, 640 p.
6. Alisher Navoii, *Mahbub ul-qulub*, Munshaot, Vaqfiya, vol. 14, Tashkent, 1998, 304 p.
7. Akhmedov T. *Khamsa, qakhramonlarining kharakter zhозibasi* (The character charm of the heroes of Khamsa), Tashkent, 1986, 68 p.
8. Bobur Zakhiriddin Mukhammad, *Boburnoma*, Tashkent, 1989, 368 p.
9. Ergashev Q., *Uzbek nasrida insho* (Essay in Uzbek prose), Tashkent, 2011, 108 p.
10. Yusupova D., *Uzbek mumtoz adabieti tarikhi* (History of Uzbek classical literature), Tashkent, 2013, 272 p.
11. Haiitmetov A., *Navoiikhonlik suhabatlari* (Navoiy conversations), Tashkent, 1993, 216 p.